

Ескерткіш тақта ашылды

Қаламыздағы Северный көшесіне Ұлы Отан соғысының, ішкі істер органдарының ардагері, милиция полковнигі Болат Шәпеновтің аты беріліп, көшеге ескерткіш тақта қойылды.

Қыркүйектің 24-і күні өткен ескерткіш тақтаның ашылу салтанатына мекеме басшылары, Болат Шәпеновтің туғантуыстары, дос-жарандары жиналды.

Болат Шәпенов 1926 жылы 26 желтоқсанда Баянауыл ау-

данында туған. Ашаршылық жылдары әке-шешесінен айырылып, Баянауыл балалар үйіне орналастырылады. 1943 жылы Баянауыл аудандық әскери комиссариатының шақыруымен әскерге аттанып, Ұлы Отан соғысына қатысты. Соғыста көрсеткен ерліктері үшін «Ұлы Отан соғысы» орденімен, «Ерлігі үшін», «Берлинді алғаны үшін» медальдарымен марапатталған.

Болат Шәпенұлы 1957-1982 жылдар аралығында Екібастұз қалалық ішкі істер бөлімінде қызмет атқарды.

Ардагердің тұңғыш ұлы Шаймаруар Болатұлы әкесі жайлы естелік шерте келіп:

- Әкем әрдайым «қызмет - қолдың кірі, ал халықтың саған деген сенімі, махаббаты мәңгілік» деген ұстанымды бізге, балаларына, үлгі етіп кетті, - деді.

25 жыл еңбегі ескеріліп, Болат Шәпенов «Мінсіз қызметі үшін», «Милиция үздігі» белгілерімен, алғыс хаттармен марапатталып, 1982 жылы милиция полковнигі шенінде демалысқа шыққан.

Ә.Орынтаева